

Vigeli Schmed-Berther da pia memoria



Ins emblida dabet, oz tuttavia. Era in um sco il Vigeli Schmed dil Plaun. Sas ti, nua il Plaun ei? Matei strusch. Ei setracta dallas quater casas che stattan datier dalla caplutta da sogn Leci a Cavorgia. Quater casas che fuorman in'uciva amureivla, tschentadas ch'ellas ein amiez bials praus grass. Cavorgia ei in uclaun quiet, empau giud via. Pégn bracs e stgirs miran bunamein da finiastra en. Plontunas ch'ei cuscheivlas sco la tiara sezza.

Ina solia casa ei aunc habitada, ina solia. Las autras miran sepiarsas viers las Badugnas. La plipart dils vegls cussadents han dau adia per adina. Per ils giuvens han loghens dapersei buca la tita.

Vigeli Schmed ei spartius ils davos dis dallas olmas. Quei ei urbida, ina pagaglia nundetga per tgi ch'ei vivius sco el ei vivius, dils anno 1889 entochen 1972. In pèr lingias ein buca stgisas da designar in maletg da passa otg decennis. Els fuvan endisch fargliuns a calur, ils affons dil Tumasch e dalla Barla dil Plaun. Scochemai ha ei tucbau agli da semetter en stuera. El tschintschava bugen dils onns da pastur, il Vigeli, ch'era la finfinala s'avanzaus entochen signun. Signun d'ina caschada da quasi tschien vacas fuva buca nuot.

Il giuven grad e bein fatg ha buca stuiu ir ad

encurir da maridar cun latiarna. Nuota da far curvien. Bein enqual mamsella da lezzas uras ha tschurrau il nas il di ch'ins ha clamau ora il Vigeli Schmed e la Maria Berther da Camischolas. Empau dad ir giun Cavorgia bein. — Probabel ha la Maria ris giudlunder. Ella ei vegnida ed ha parturiu endisch affons. Ina bun'aria, quella aria da Cavorgia.

Vigeli Schmed, pur, Cavorgia. Aschia steva ei scret avon biars onns el cudisch da telefon. Ils onns ch'ins deva pli bia peisa sin la versiun tudestga. Ins po bein dir ch'el vevi tschaffen da far il pur, il Vigeli che mava adina dabet. Gliez san ins era. Ch'el vegneva magari da perver ch'els auters vevan strusch dau en l'emprema, la damaun marvegl. Ils tschofs dil contuorn savesen risdar dil con. Cura ch'el mava per tortas coller da far cudetschas. Roma verda e lonzia prendeva el entirs bratschs a casia. Il Vigeli fuva dasperas in vischler talentau. E s'entelli, il gudogn accessori fuva d'engrau.

La mesadad da sia veta ha el giu temps da far caluster, caluster ed ugau dalla caplutta. Sco buobetgel egl emprem baun vai jeu viu. Cun tgei devoziun il Vigeli fageva caluster e ministrant ed assistent dil caplon. El era meglier che nus enten recitar il confiteor.

Sco quei ch'el ha giu bien quitau pil fatg dalla caplutta ha el era tgirau ses aviuls, ses aviuls ual in tgaubriechei dator baselgia sil plattiu. Malgrad la stenta per nov affons, dus veva il Segner priu sco bambins, per ils aviuls veva il Vigeli adina peda. — Ch'ins lubeschi a mi d'allegar in schabetg. Mo gliez, jeu vevel ual empiru da scumiar las combas. Il di d'emprema stad che jeu sun ius cun mia sora pli veglia giul Plaun per petroli. Els vevan ina buot en tschaler e nus vegnevan mintgamai cun la honta. Jeu seregor-del sco sch'ei fuss stau ier. Il Vigeli e sia consorta fagevan ora mèl. Cumpatg ch'il Vigeli ha fatg persenn mia queida. El carga viaden ellas patgnas e tonscha a mi ina dèga buccada. Cun in surrir migeivel sin las levzas. Ils onns ein vargai.

Jeu vai fatg nuot encomi.

Auter che tschintschau cun el enqualga duront nossas sentupadas a Sedrun. La sera dalla veta ch'el veva retratg dimora en casa da ses fegls. El tschintschava bugen da tschels onns e mirava meinsvart cun ina certa passadegna viers Maunsut.

Alla consorta ed als affons nossa condolien-tscha, al Vigeli il ruaus perpeten.

Martin dil Grep